



**L'Ajant
MWASSE
Jacques «Maujeni»
Desmet**



Licence GNU

Vos p'loz bin copyî, doner à conèche èt candjî ci scrîjadje ci, tot sùvant li drwèt do djeu dèl licince GNU. (GNU Free Documentation License), prumêre modéye èt co totes lès cènes qui vêront après, scrîtes èt donéyes à conèche pa l' « Free Software Foundation. » Ci lîve ci n'a pont d' bokèt qu'on n' pout nin candjî, à paurt li scrîjadje dèl couviète dèl prumêre al quatyinme pâge. One copîye dèl licince èst mètouwe po tortos dins « Licence de documentation GNU. »

Tous droits de reproduction, d'adaptation, ou de traduction, par quelque procédé que ce soit, réservés pour tout pays sans l'autorisation écrite de l'auteur ou de ses ayants-droit.

©Jacques Desmet

11b12 allée des Marronniers 5030 Gembloux (Wallonie)

0475/667195 Maujeni@outlook.com

D/2018 Desmet Jacques/Éditeu

Djè l'a èdaumé après l'afaîre Dutroux. I m'arè falu t't-à l'eûre dipus d' vingt-ans po l'achèver... èt trover lès liâds po l' mète su papî.

Vingt-ans : po raler à l' sicole di walon Lucyin Somme. Bin oblidyî, s'on vout prusinter one saqwè d' comufaut...

Èt co ; dji v' dî branmint dès côps mèrci Chantal Denis po-z-awè prins d'ssu vosse tims po m' corèdjî èt r'lîre li lîve.

Èt co ; on tot, tot, fèl mèrci à José Schoovaerts, alias Djozé Rabulets, Profèsseûr Titorval, Profèsseûr Toylravi, etc... po sès désséns, po l'arindjemint dès pâjes, qui dj' n'âreû jamais soyu fé mi minme...

L'ajent MWASSE

**L'ome è-st-on touweû,
l' cia qui m' vénrè disdîre n'a nin co skèpyî !**

Maujeni



Kid'napadje

« Â ! Vo-l'-la ! »

Djiblou. Yinte li tunèl èt l' rond-pwint, li *break* a taurdjî tot frin.nant à rauyî sès bindeladjes.

« S'i vos plaît bin, m' crapôde ! »

Dès blondès longuès trèsses solèvéyes pa l' bîje, chapéyes di d'zo on blanc bobo. Rén qu' deûs féns-ouys au d'zeû d'one sipèsse èchèrpe nukîye pa lès rafurlantès mwins d'one man.

« Oyi, Madame ? »

Li feume padrî s' volant, à mostré dès bwèsses di cârton èt dès-atricayes su lès bankètes di d'drî.

« Faut qui dj' vòye min.ner cès cacayes là po l' Noyé dès-èfants d'one sicole al rouwe di Mazi. Mins dji n' so nin d' Djiblou, èt dji so pièrdouwe. Vos n' mi sâriz mostrer l' vòye ? »

Céline, 13 ans, a radjusté lès-aburtales di s' satch à dos, èt v'nu pus près dèl bôrd dèl vòye. Quatre eûres èt d'méye. Li brune tchaîyeût d'dja. Après si scole èle diveût co r'passer pa mon l'apotecaîre, i lî faureût co bourer pus rade po rabroker à s' maujone èt n' nin mète sès djins dins lès transes.

« Vos n'èstoz nin lon èri, Madame, dji vos l' vou bin dire mins dji n' sé comint m'î prinde... Lès-èfants vont-èsse binaujes po lès-atricayes... I vos faut prinde li vòye di Nameur, vélà à drwète èt adon pwis... rid'chinde come po-z-aler è l' vile, rimonter jusqu'al rond pwint èt ratraper l' brisé d' Mazi... »

« Dji n'î comprind rén, brisé d' Mazi, c'èst come si vos m' causeriz è Nameurwès ! Èt avou mès vîs-ouys ! Alez, on fait martchî, vos montoz dins m'-n-auto, vos m' mostroz l' vòye dèl sicole. Dj'î va rademint pwârter lès-atricayes èt après dji v' ramin.ne fén rwèd à vosse maujone. Èt dji v' dôrè co l' grand *Marsulapi* qu'èst dins m' cofe. Vos-èstoz one miète trop grande po ça, mins vos-avoz seûr one pitite sou ou on p'tit frère. Insi, il ârè one bèle bistoke èto po s' Noyé ! »

Céline s'a r'ssatchî d' l'auto. Al sicole come à s' maujone, on lî a bin èspliqué qu'èle ni dwèt nin griper dins l'auto d'on' ome qu'èle ni conèt nén. On lî a assez repèté ! Qu'i-gn-a dès baligands qui s' mosturenut pâr trop djintis, qui donenut dès boubounes, qui

savenut comint s'î prinde avou lès-èfants. Èt après chî samin.nes, on r'trove li cwârp di l'èfant tot comoudri l' long d'one chavéye ou à mitan ètèré dins on bwès. Mins, poqwè awè peû d'one vîye feume, tote ratchitchiye pa d'zo sès blancs tch'vias, avou sès grossès lunètes di skâye èt s' pètote fine rodje come on cloun' ?

Céline agneûve su l' pwinte di sès wants tote sondjaude :

La waîte, faut co bin qu' ça tchaiye sur mi !

« Dji n' pou nin monter, Madame. Nosse man m' l'a disfindu ! »

Li vîye feume lî a stindu saquants mini *Bart Simpson* djane poyon.

« C'èst dès cias qu' dj'a d' trop. I sont por vos, vos pouroz fé l'distribucion dins vosse sicole. I-gn-a dès djins qui m'ont d'dja mostré l' vîye deûs côps. Mins dji n' so nin maline assez po tirer m' plan tote seûle ! Alez, s'i vos plaît, montoz avou mi ! Dji n'a pus wêre di timps ! Mès-èfants èt mès p'tits-èfants m' ratindenut po soper ! »

Céline balzineûve d'on pîd d'ssu l'ôte. Qwè fé ? nin chouter ç' qui s' man lî aveût dit ? Jamâs ! Oyi, mins c'èsteût po l' bin dès-èfants. Dès-èfants d'one sicole di p'tits malèrèûs. Èt adon pwis, li régue, c'èsteût po lès-omes, nin por one vîye mémé, tinrule come li mène...

« C'èst bon... Mins après vos m' min.neroz amon l'apoticaire ? Dji dwè rabroker à nosse maujone divant cénq eûres, ôdoubin, dji m' va fé touwer ! »

Ça bauchèle, ti n' l'âreûs mia soyu dire, a-t-i sondjî dins s' tièsse.

« Top ! Come on-z-a dit ! Montoz padrî. Atincion aus-atricayes. Dji n' voureû nin qu' vos m' lès spîyerîz ! »

« Vos p'loz r'ssatchî vosse bonèt, i n' plout nin dins l'auto ! »

D'on côp d' tièsse, lès blondès mèches s'ont spaurdu su lès deûs spales.

Bèle, bèle au d'là : sondja-t-i...

Nén one auto po s'aporçure dèl sin.ne. Nin one djin. Il èstin' bin trop prins pa lès condjîs d' Noyé, èt lès sclats dèl lumîres dèl vile.

T't-ossi èdwârmant qui l' wate d'ètêr qui spotcheûve li nez da Céline po lî fé piède si tièsse...

Il a rauyî l' blanke pèruque djus di s' tièsse. L'auto s'a rênondé dins l' daladje...



Licrapôde

Ç'tèleci, c'est vraîmint l' diâle què lî aveût d'né. I n'aveût nin yeû à lèver si p'tit dwègt. Li pus sbarant, c'est qu'èle lî doneût co d' pus plaîji qu' lès-ôtes ; lès cènes qu'il aveût tant yeû dè mau avou èt què lî aveût falu tant d' tims po lès rèlire.

Li djoû qu'i l'aveût vèyu po l' prumî côp, I n'enn' aveût nin co tant ausse. Todi nin ostant qu' lès djoûs quand i s' ritroveûve à pantî come s'i-gn-âreûve yeû one saqwè d' triviè dins s' bas-vinte. L'angoche qui monteût, djoû après djoû, n'aveût nin co prind li d'zeû su sès niêrs. Li candjemint ariveûve avou l'idéye qu'i pièrdeût pîds èt n' pus sawè qwè fé. Adon, tot-au d'bout, li râje rimplicheûve tote si tièsse, tot djusqu'à ç' qu'i...

Ç' côp ci, tot l' razouyant al cwane dèl vòye, sès mèches di tch'vias aplaquéyes su sès massales pa l' plaîve, li dêr do l'apicî, d' l'awè por lî tot seû, aveût gagnî s' cwârp pîre qui fwace. Il enn' aveût mau s' vinte après lèye.

Ci n'esteût nin come ça qu'i l'âreût yeû d'vu l'arin.ner. I l' saveût bin. I waîteût todi bin à ç' qu'i fieût, èt là... I n'âreût jamaîs d'vu tchandjî l' mwinre faflote dins sès-abitudes, èt là...

I sayeûve bin di s' rasténre. I sayeûve bin d' ténre à gougne li diâle què lî monteûve di d'dins s' bas-vinte. Po waîtî d' fé passer sès fives, i d'chindeûve au casino d' Nameur... Ça aveût mau toûrné ! Il aveût pièrdu. Èpolté mwârt, il aveût tot pièrdu...

Au d'zeû di ç' què l' taneûve dispôy todi, asteûre il lî faleûve co trover à s' rifé. C'è-st-adon qu'il a sondjî a fé d'one pîre deûs côps : one crapôde èt dès liârdès au d' dizeû... Tot sûte il aveût sondjî aus Dècrampes : leûs fabriques, lès parints todi su tchamps su vòye fou do payis, leû crapôde qui vikeût dins leû tchèstia, pus sovint tote seûle avou one mèskène. I-gn-aveût pus sovint pèrson.ne po rawaîtî al crapôde.

Èt vola, i n' rigrèteûve nin d' s'awè lèyî d'aler. I 'nn' esteût fén binauje. Tot rabatu, il aveût bin l' timps, poqwè d'dja yèsse dins lès fives ?

Do timps por li, do timps po lès parints, do timps po l' crapôde...

C'est l' diâle qui m' l'a d'né ; sondjeût-i dins s' tièsse, tot li r'ssachant one topéye di tch'vias fou di s' visadje. Il aveût fait dès-ouys come one sârlète do veûy come il avîn' ricrolé tot sètchichant. Sès lèpes si r'trossin' al sov'nance. Èle richoneûve à one poupène, fine frèche pa d'zo l' plaîve. Li lumîre aveût ènondé s' visadje, quand il aveût astaurdjî s'-t-auto, drovu l' fignèsse, tot s' clinçant su l' banquète da costé, èt li d'mander :

« Avoz dandjî d'on côp d' mwin ? »

Èle n'aveût nin tchicté. Èle n'aveût nin yeû peû. Elle aveût passé s' tièsse èt sès spales pa l' fignèsse :

« Dji cache après m' vôle ! »...

Maugré lèye èt sès dotances, i l'aveût fait monter dins s'-t-auto.

One ènocin.ne...

À paurt qu'èle ni l'esteût nin ! I-gn-a nin one à r'ssatchî do moncia ! Èle polenut tortotes dire ci qu'èle volenut ; i-gn-a nin one qui n'est nin nwêre à craya ! Nin one qu'est blanke come nîve ! Minme lès cènes qui s' fyin' valu, quand èle compurdin' pa quén trau qu'èlle alin' passer.

Lèye, èle n'aveût nin fait chonance. Èle n'aveût nin sayî dèl fé blamer. Èle n'aveût nin priyî l' Bon Diu. Èle ni s'aveût nin mwaijelé. Sès nanches da lèye, l'avin' tchandjî dès peûs èt dès brèyadjès dès-ôtes.

« C'est l'eûre di vos r'lèver ! »

I vèyeûve ça èvi : mins comint lès ténre à gougne autrumint qu'avou one drogue po lès fé dwârmu ? Waîte qu'èle sarin' yeû dislachî èt pèter èvôle. I n'aveût jamais yeû l' cas, èt ça n'arivereût nén, nin avou totes lès sognes qu'i purdeût. Maugré ça, l'idéye qu'i-gn-a one qu'âreût plu foute li camp èt aler raconter tot ç' qu'i

fièuve, li doneûve dès maus d' tièsse èt l'èspêchî d' dwârmu su sès deûs-orâyes.

C'èsteût l' bon momint po tos lès deûs. Il alin' paurtadjî...

Èle s'aprèsteûve à drovu sès-ouys. Il aveût tot cârculé al munute près. I n'aveût pus qu'a ratinde qui lès drogues ni sièvenuche pus à rén. Èt adon...

Quand i l'aveût apicî, i n' si rindeûve nin co compte qu'il ènn' aveût tant dandjî qu' ça. Ça aveût djourné dins l' fond di s' vinte ; one fwace qu'i n'âreût soyu rasténre, qui s' rapaujeût, èt tot d' sûte après s' rênonder co pus fwât.

Il a passé s' mwin su s' visadje, sîbaré d' sinte li douceû d' sès roselantès massales. Rinètîye dès machuradjes, c'èsteût l' pia d'one èfant al fachète.

« Dji veû qui v's-èstoz dispièrtéye » a-t-i di tot s' clinçant po chicheloter à s'-t-orâye. Sins r'lèver s' tièsse, il a toûrné l' visadje po l' rawaîtî d' costé, èt veûy sès paupîres si drovu doucètémint.

Avou lès drogues, èle diveût co yèsse one miète pièrdoûwe. Èle l'èstin' tortotes. I ratindeûve ci momint là. Il aveût pèwyî po l' veûy di pus d' cint côps, sins jamais s'è r'pachî. Po-z-èdaumer, èle cachin' à sawè èwou qu'èlle èstin' : à rèlire li sondje do vraî !

Adon, tote èwaréye, èle si sovenin', tot l'zi r'monteûve al tièsse.

Èle compurdin' !

L'acèrtinance sèreût marquéye dins sès nwêrès purnales : i n'âreût manqué ça po rén !

I s'a rastampé èt finde sès lèpes po li mostrer s' bia costé. Lèye, èle aveût sès-ouys pièrdus su l' plafond. Si tièsse a rôlé su l' matras', èt èle l'a razouyî...

I rawaîteûve l' èfant paujêremint, mins ci n'èsteût nin ça qu'âreût p'lu candjî ci qu'èle pinseûve. Il avin sitî trop lon tos lès deûs po qu'èle s'è faîye co dès-idéyes.

Èle saveût. Èle saveût fwârt bin quî ç' qu'il èsteût. Èle saveût èwou qu' ça l' min.nereût. Tot èsteût là, dins sès nwêrès purnales, aveté su s' visadje. Èlle a scauyî sès-ouys tot lès r'lèvant sur li. Èle n'èsteut pus strindûwe. Il aveût fait tot ç' qu'i faleût po ça...

Lès quèsses qu'èle lî âreût p'lu d'mander ; i-gn-aveût pus nin one dès-ôtes qu'avîn' passé pa sès mwins po lî p'lu rèsponde :

« Combin d' tims faurè-t-i qui dj' sopwate co ça ? »

« Quand m' laîroz moru ? »...

Co saquants-eûres, tot sèreût achèvé. Èle ritrovereût sès parints po l' pris d'one boune cassète...



Lèstagueûs

Fonderîyes Mélotte. Costé dèl parking dèl-autos dèl directeûrs. Dîre qui l'en d'dins èst grumî d' camèras po waîtî s'i-gn-a pont d' baligands qu'abrokenut, èt qu'on-a yeû qu'one chaléye baurîre à zoupeler po p'lu machurer leû d'avanture à façâde. Méyenût, l'eûre dè régler sès comptes.

«Done mu cor one bombe di rodje ! »

«C'est l' dêrène, dispêche tu ! dji djale ! »

On fèl plaîji pwârtéve Silvin Pèloso. Asteûre, c'est lès veûy èvi qu'i fieûve dispôy qui l' fabrique aveût stî sèréye po d'naler

yèsse rimontéye è l'Èspagne. Li râje boleûve dins sès vwin.nes. Li, qu'aveût d'dja d'vu viker li fén dès mines à tchèrbon avou s' pa. Qu'aveût d'vu chômer dès-ans divant di r'trover d' l'ovradje, véci à l' fabrique Mélotte, vola qu'i s'ritroveûve barakî tot-ute yinte lès mwins dès cias què li avîn ridoné l'ausse di mia viker.

Mi r'trover pus bas qu' tête cor on côp ! Â nènî, i mè l' payeront.

Maugré l' djaléye què li d'neûve di l'ongléye, il aspouyeûve à mwât su l' boton dèl bombe à rodje... èt lès-afronts courin' su lès murâyes.

Co deûs munutes èt Primo Litalo aveût racouru èt l' gougîn :

« Èt qwè ? T'as bin rade fait ? »

« Oyi, cès d'mé-cougnîs là, ènnè sèront quite di rispaumer leû d'vantûre. »

« Dj'a tot machuré come ti m' l'as dit d' fé ! »

« I faut qu'i pâyenuche ! On va waîtî à vos r'trover d' l'ovradje : qu'il ont dit ! »

« Lès pouris ! Ça fait dès mwès qu'on pwinte. » Primo a r'loukî on daîrin côp s'-t-ovradje al lumîre di s' lampe. Des tags t'tossi laudjes qui dès wagons di tch'min d' fiêr. On toûrmint po lès cravates èt lès blankès paumes dès-envêlopes di fén d' mwès à chîs chifes.

Si keûr a manqué d' taurdjî quand il a vèyu l' fin d' l'andèle machuréye dissu li d'vantûre :

« *Solia, t'enn'as pus po lontins !* » « Silvin ! Tant qu'à fé, ti p'leûves mète ti signature ! *Solia* ! T'ataques nosse dirècteûr di l'ONEM, i sâront rade qui c'est nos-ôtes qu'a r'blanki l' fabrique à nosse môde ! I n'âront wêre à cachî. »

« Ratind one miète ! Avou tos lès-ovrîs qu'il ont mètù à pîds, i n'âront... »

« Rèface ça tot d' sûte ! »

« T'as vraîmint l' cu strwèt, dji n'a pupont d' coleûr. »

« Boudje tu ! »

Avou ç' qu'i-gn-aveûve co dins lès bombes, il a polu r'catchî lès scrîjadjes què lès-arin' yeû vindu.

Primo à soflé : « Corèdjî ! T'èsteûs trop mwaîs qu' po t' sawè rasténre ? »

« Djè l' veû èvi. Djè lî freû ravalè s' cravate di râje chaque côp qu' djè l' veû ! Dj'enn'a plin lès guètes di couru èt d' fé tos lès-uchs po trover d' l'ovradje. Chaque côp i-gn-a one chîléye di man'dâyes qui mougnerin' lès pègnons d' leûs-orâyes po-z-awè l' seûle place qu'i-gn-a, èt ça n' rote jamaîs ! »

« On-î ariverè, dji tè l' di, mins tot ratindant, i nos faut fé l' gros dos. Alez, on pète èvôye ! »

Il ont r'passé l' baurîre co pus rwèd qui l' vint d' bîje. Rabrokés à yute dins l' 305, il ont drovu one canète di bîre.

« Damadje d'enn'arivé là, mins bon, à t' santé ! »

Il ont t'nu leû linwe sins motî. Lès mwaijès sovnances rimontin'. Pupont d' fabrique, pupont d'ovradje, one tène envèlope à sucî. Li Noyé sèrè co pus tène, li. Faute di bûre, on mougne do stofé !

« S'on-z-èireût pa lès-éyoliènes, i-gn-a pèrson.ne su cès novèlès vôyes là. Dji poureû rôler rouf-rouf po fé passer tot ç' qu'on-z-a è nosse tièsse. »

« Ça n' mi va nin d' trop. Couru come on dislachî, ça n' mi va nin d' trop... »